



Karnival Kerjaya dapat sambutan mahasiswa UMP

Lebih 2000 mahasiswa Universiti Malaysia Pahang (UMP) mengambil peluang meneroka peluang pekerjaan yang ditawarkan oleh syarikat yang berfokuskan kejuruteraan dengan penganjuran bersama Karnival Kerjaya Sektor Berfokus anjuran UMP dengan kerjasama Talent Corporation (TalentCorp) Malaysia Berhad pada 9 Oktober 2013 yang lalu bertempat di Dewan Kompleks Sukan UMP Kampus Gambang.

Karnival dirasmikan oleh ahli Parlimen Paya Besar, Yang Berhormat Dato' Haji Abdul Manan yang turut dihadiri Pendaftar UMP, Haji Mustafa Ibrahim dan Pengurus Kanan TalentCorp, Siti Norliza Mohd. Sahar.

Dato' Haji Abdul Manan berkata, sektor kejuruteraan sebenarnya mempunyai banyak cabang yang boleh diceburi selain mendapat permintaan yang tinggi dalam pembangunan

ekonomi negara.

Beliau menasihatkan bakal graduan agar merebut peluang keemasan ini untuk menghadiri temu duga terbuka bagi mengisi kekosongan jawatan yang bersesuaian dengan kelulusan masing-masing.

Menurut Siti Norliza, penganjuran karnival ini merupakan usaha komprehensif antara pihak Talent Corporation dan universiti di Malaysia bagi membantu bakal graduan meneroka peluang pekerjaan.

Karnival yang dianjurkan ini adalah secara berfokus dengan memberi tumpuan terhadap beberapa bidang Kejuruteraan; Minyak dan Gas; Elektrikal dan Elektronik; Teknologi Maklumat; Telekomunikasi; Bioteknologi; Kewangan; Sains Kesihatan; Pelancongan dan banyak lagi.

"Menerusi program ini juga, mahasiswa

atau bakal graduan mampu mendapat pendedahan dan latihan intensif mengenai persiapan yang lengkap sebelum memasuki dunia kerjaya.

"Ianya turut membuka ruang kepada pihak industri bersama membantu kumpulan sasaran terbabit untuk mendapatkan jawatan yang bersesuaian," katanya.

Sementara itu, Haji Mustafa berkata, program ini dapat memberi peluang kepada bakal graduan bertemu secara terus, berinteraksi dan membina jaringan dengan bakal majikan bagi mendapatkan informasi mengenai kerjaya yang sesuai dengan kehendak, kemahiran dan kelulusan.

Beliau menghargai usaha yang dijalankan pihak Bahagian Kaunseling dan Kerjaya Jabatan Hal Ehwal Pelajar dan Alumni dalam menayakan program sebegini.

Lebih 30 syarikat menyertai karnival ini dan antaranya adalah Honda Malaysia Sdn. Bhd., Hicom Automotive Manufacturers Sdn. Bhd., Dicasting Sdn. Bhd., MMC Oil and Gas, Mieco Manufacturing Sdn. Bhd., Kaneka (Malaysia) Sdn. Bhd. dan Proton Holding Berhad.

Selain itu, pelbagai aktiviti turut diatur sepanjang karnival berlangsung, antaranya temu duga terbuka, ceramah kerjaya, pameran kerjaya dan keusahawanan.